

MISSIONARY DAY THUCHAH

Pathian zarah kum **2026 Missionary Day** chu kan lo thleng leh ta reng mai, a va lawmawm em! Lalpa Isua hming chu fakin awm se, Tlangtina Lalpa kohhran hote, kan Lalpa Isua Krista hmingin '*Missionary Day*' *chibai* kan buk vek a che u.

Kan Lalpa Isua Krista khawvela a lo kal chhan leh a thupek ropui ber mai **Chanchin Tha hril hna** ti hlawhtling turin, September 25, 1945 ah khawvel pumpui huapin UPC te kan lo ding a. Pathian pawhin mal min sawm hle a. A hnu lawk kum 1950-ah India ramah UPC chu lo ding zelin, kum 1969-ah UPC-NE India chu a in dang a. Khawvel puma kan Kohhran din ni **September 25** chu **Missionary Day** atan UPC-NEI chuan, um 1976 atangin kum tin kan hmang ta a, kumin hi a vawi 51-na a lo ni ta a ni.

Missionary Day hi Ramthim rawngbawlina kawnga Kohhran hote infuih thar nan leh, General Missions puala thawhlawm lakkhawmna ni atan hman thin a ni a. Hemi nia thawhlawm kan lakkhawmte chu District Missions kaltlangin General Missions-ah theh luh thin tur a ni.

International report:

Khawvel pum huapa kan rawngbawlina thlen chin hetiang hi a ni:

- | | | |
|--|---|--|
| 1. Ram bung hrang (nation) thlen chin | - | 203 Nations |
| 2. Territories thlen chin | - | 39 |
| 3. Kohhran (Local & Preaching point) | - | 45,562 |
| 4. Thawktu (workers) neih zat | - | 45,880 |
| 5. Total member zat | - | Maktaduai ruk leh nuai khat singriat chuang. |
| 6. Pathian zarah nitin member thar 845 leh Kohhran thar 7 ding zel ang kan ni. | | |

NEI report: Tuna UPC-NEI dinhmun hetiang hi a ni –

- | | | |
|-------------------------------|---|----------|
| 1. District zat | - | 12 |
| 2. Gen Mission field neih zat | - | 11 |
| 3. Kohhran pui enkawl field | - | 2 |
| 4. Kohhran (Local Church) zat | - | 989 |
| 5. Preaching Point neih zat | - | 228 |
| 6. Chhungkua awm zat | - | 26,615 |
| 7. Member neih zat | - | 1,23,199 |

Tun dinhmuna General Mission Dept. rawngbawlina:

North East India UPC, Mission Department-ah hian Mission field hrang hrang Sawm pakhat (11) kan nei mek a, chungte chu –

- | | |
|----------------------------|---------------------------------------|
| 1) Assam field | 2) Upper Assam & East Arunachal field |
| 3) Dimapur field | 4) Arunachal field |
| 5) N.Bengal field | 6) Sikkim field |
| 7) Bihar & Jharkhand field | 8) Odisha field |
| 9) Bhutan field | 10) Andaman & Nicobar Island field |
| 11) Diphu field te an ni. | |

Tunah hian General Mission field hnuaiah hian Thawktu (Paid workers) 162 awmin, member 11,359 an awm mek a. Delhi leh Kolkata field-ah thawktu (Paid worker) mi 10 awmin, member 869 an awm mek baw. Heng bakah hian District hrang hrang hnuaiah thawktu (Home missionary) 160 vel (2026 report) kan nei baw a, General Missions Department atangin Bangladesh worker panga te tanpuina thlatin pek thin a ni baw. Kan Missionary te rawngbawlina Pathianin mal a sawm zel a, kumin January – August thla chhung hian mi thar 289 Lalpan min pe a ni. Lalpa chu fakin awm rawh se.

General Mission Field rawngbawlina hi Tualchhung kohhran (Local) tinin target kan pek khawm atang te, Buhfaitham atang te, Pawlho leh chhungkua te, mimal thahnemngai ten Partner in Mission (PIM) leh Donation an pek khawm atang te, leh Kohhran hote tawngtaina avangtea kal thei a ni a.

Heng thawhlawm kan pek khawm atang tein tunah hian Kohhran puin Delhi-ah Flat pahnih (2) lein, quarters leh Biak In te kan nei tawh a; Kolkata-ah pawh UPC building te kan nei tawh baw a. General Missions hmalaknain Guwahati khawpuiah pawh UPC House tha tak mai, quarters bakah Guestroom, a mamawh apiang tana man tlawm tea thlen theihin kan lo nei thei ta baw a ni. Lalpa chu fakin awm rawh se. Heng zawng zawng hi Pathianin Kohhran hote kaltlanga malsawmna min pek a ni a, Pathian chungah leh Kohhran hote chungah pawh lawmthu kan sawi tak meuh a ni.

Tunah hian Siliguri khawpuiah pawh Kohhran building tha tak mai sak leh mek a ni a, quarters te leh Guestroom te dah leh tum a ni baw. Hemi atan hian tualchhung Local Missions Department ten ni khat tal sum tuak hnattlang min neih sak turin kan inngen kha a ni a. Thehnemngai taka hnattlang min neih sak theuh turin leh, October thla ral hmaa District kaltlanga General Missions-ah rawn chhunglut hman turin kan in ngen thar leh baw a ni.

Khawvela Isua Krista lo kal chhan ber chu, **‘Boralte zawnga chhandam’** a ni a (Luk 19:10). Amah berin thawk zo hman lova vanah a lawn tak avangin, a aiawha lo chhunzawm a, khawvel pumah a thihna leh phumna leh thawhleyna Chanchin Tha hriatpuitu (Partner) atan te nang leh kei hi Lalpan min sawm a ni tih i hre thar reng ang u.

Tunah hian kan Missionary ten theitawp chhuahin ramthimah rawng an bawl mek a. Khawlum leh vawt lutuk hmunah te, dodalna leh nekchepna karah, an nunna hial tan pawha hlauhthawn awmna hmunah te rawng an bawl mek a ni.

Nang leh kei hi Ramthim ramro ah Missionary hna thawkin kal ve thei lo mah ila, kan tawngtaina leh thilpek hmangin, Isua thawhpuitu (Partner) kan ni ve thei tih hre thar leh ila. Isua hian kan In leh lo te, kan sum leh pai te, kan bank Account te lo chu khawvelah lu nghahna tur a nei lo a ni tih hriain, Vawiin **Missionary Day** ah hian kan rilru ti thar leh a, Thlarau bo veina rilru pu thar leh theuh turin Kohhran hote kan inngen thar leh a ni e.

Lalpan Malsawm vek che u rawh se.

Issued by the General Missions Department, UPC-NE India.

General Headquarters : Aizawl